

四庫全書

集部

欽定四庫全書

集部  
宋藝圃集卷七

詳校官中書臣陸湘

侍讀臣孫球覆勘

總校官庶吉士臣何思鈞

校對官編修臣李堯棟

謄錄監生臣李元位

欽定四庫全書

宋藝圃集卷七

明 李棠 編

王安石二百一首

示寶覺

宿雨轉歎煩朝雲擁清迥蕭蕭碧柳軟脉脉紅蕖靚  
臥如有懷荒乘豈無興幽人適過我共取牆陰徑

定林示道原

昨登定林山俯視東南陔但見一方白莫知所從來濕  
銀注寒晶奩以青培堆迢迢晻靄中疑有白玉臺是夕  
清風興煩雲豁然開嫦娥攀桂枝顧影久徘徊杖藜忽  
高秋陳迹與子陪壯觀非復昔平蕪夜莓苔

自喻

岸涼竹娟娟水淨菱帖帖鰕搖浮游鬚魚鼓嬉戲鬣釋  
杖聊一喝褰裳如可涉自喻適志歟翩然夢中蝶

獨卧有懷

午鳩鳴春深獨卧林壑靜微雲過一雨浙瀝生晚聽紅  
綠紛在眼流芳與時競有懷無與言佇立鍾山暝

秋早

暮尋蔡郭西獨覺秋尚早山路葩卉繁野田風日好禪  
林鳥未泊經屋塵初掃蠻藤五花簞復足休吾老

次韻舍弟江上

岸紅歸欲稠渚綠合猶晚晴沙上屐輕暖水隨帆遠吹  
波戲魚動掠葉飛禽返著意覓幽蹊桃花悞劉阮

送惠思上人

黃鶴撫四海翩然落中州一聽笙與鏞低回如有求飛  
鳴阿閣上好與鳳凰遊顧憐魯東門無事反悲愁歲晏  
忽驚去問胡不少留因知網羅外猶有稻粱謀

雜詠 三首

懷王自墮馬賈傅至死悲古人事一職豈敢苟然為哭  
死非為生吾心良不欺滔滔聲利間絳灌亦何知

二

先生善鼓瑟齊國好吹竽操竽入齊人雅鄭亦復殊豈  
不得祿賜歸卧自歎歔寥寥朱絲絃老矣誰與娛

三

商陽殺三人每輒不忍視亦云食君食報禮當如此波  
瀾吹九州金石安得止永懷南山阿慷慨中夜起

寄二弟時往臨川

蕭條東風高吹我冠上霜我行歲已寒悲汝道路長持  
以大馬心千里不得將使汝身百憂辛苦冒川梁青燈

照詩書仰屋涕數行不有親戚思詎知遠遊傷

解使事泊棠陰時三弟皆在京師

二首

始吾泊棠陰三子不在舟今當捨之去三子還遠遊茫  
然千里水今見荻花洲俛仰換春冬紛紛空百憂懷哉  
山川異往矣霜霰稠登高一涕泗寄此空江流

二

泊船棠陰下灘水清且淺回首望孤城浮雲一何緬久  
留非吾意欲去猶繾綣馳心故人側一望三四反蕭蕭



東堂竹異日留息偃無恩被南國疑此行當翦

東門

東門白下亭摧甃蔓寒葩淺沙棧素舸一水宛秋蛇漁  
商數十室門巷隱桑麻翰林謫仙人往歲酒姥家調笑  
此水上能歌楊白花楊花飛白雲枝裊綠煙斜舞袖卷  
煙雪綺裘明紫霞風流翳蓬顥故地使人嗟迢迢陌頭  
青空復可藏鷗

飯祈澤寺

駕言東南遊午飯投僧館山白梅蕊長林黃柳芽短筇  
著沙際來略約桑間斷春映一川明雪消千壑漫魚隨  
竹影浮鳥譔人聲散玩物豈能留千時吾自懶

答瑞新十遠

遠水悠然碧遠山天際蒼中有山水人寄我十遠章我  
時在高樓徙倚觀八荒亦復有遠意千載不相忘

乙巳九月登治城作

欲望鍾山岑因知治城路躋攀隱木杪稍記曾遊處紅

沉渚上日蒼起榛中霧即事有哀傷山川自如故

舟中讀書

冉冉木葉下蕭蕭山水秋浮雲帶田野落日抱汀洲歸  
卧無與語出門何所求未能忘感慨聊與古人謀

酬冲卿月晦夜有感

夜雲不見天况乃星與月蕭蕭暗塵走坎坎寒更發樓  
歌客尚飲酩酊不畏雪巷哭復有人鄰風送幽咽紛然  
各所遇悲喜孰優劣君方感莊周浩蕩擺羈絆歸來亦

置酒玉指調絃撥獨我坐無為青燈對明滅

同杜使君飲南城

山公遊何處白馬鳴翩翩檀那十畝碧五月浮寒煙留  
客醉其間風吹江海縣出罇不見日竹外空青天焚蠟  
助月出酒光發金船狂客惜不去醉翁舞迴旋何必吹  
簫人玉枝自嬋娟歸路借紅燭兩星低馬前

書山石辭

水冷冷而北出山靡靡以旁圍欲窮原而不得竟悵望

以空歸

寄蔡氏女

二首

建業東郭望城西  
瑛千嶂承宇百泉遶  
雷青遙遙兮纚  
屬綠宛宛兮橫  
迥積李兮縞夜  
崇桃兮炫晝  
蘭馥兮衆  
植竹媚兮常茂  
柳蔦綿兮含姿  
松偃蹇兮獻秀  
鳥跂兮  
上下魚跳兮  
左右顧我兮  
適我有斑兮  
伏獸感時物兮  
念汝遲汝歸兮  
攜幼

我營兮北渚  
有懷兮歸女  
石梁兮以苦  
蓋綠陰陰兮  
承宇

仰有桂兮俯有蘭嗟女歸兮路豈難望超然之白雲臨  
清流而長嘆

移桃花示俞秀老

舍南舍北皆種桃東風一吹數尺高枝柯薦綿花爛熳  
美錦千兩敷亭臯晴溝漲春綠周遭俯視紅影移漁舸  
山前邂逅武陵客水際髣髴秦人逃攀條弄芳畏春晚  
已見黍雪盤中毛仙人愛杏令虎守百年終屬樵蘇手  
我哀此果復易朽蟲來食根那得久瑤池紺色誰見有

更直花時且追酒君能酩酊相隨否

明妃曲 二首

明妃初出漢宮時淚濕春風鬢脚垂低徊顧影無顏色  
尚得君王不自持歸來却怪丹青手入眼平生何曾有  
意態由來畫不成當時枉殺毛延壽一去心知更不歸  
可憐著盡漢宮衣寄聲欲問塞南事只有年年鴻鴈飛  
家人萬里傳消息好在蘊城莫相憶君不見咫尺長門  
閉阿嬌人生失意無南北

明妃初嫁與戎時  
羶車百兩皆戎姬  
含情欲說獨無處  
傳與琵琶心自知  
黃金捍撥春風手  
彈看飛鴻勸胡酒  
漢宮侍女暗垂淚  
沙上行人却回首  
漢恩自淺胡自深  
人生樂在相知心  
可憐青塚已蕪沒  
尚有哀絃留至今

桃源行

望夷宮中鹿為馬  
秦人半死長城下  
避時不獨商山翁  
亦有桃源種桃者  
此來種桃經幾春  
採花為食枝為薪  
兒孫生長與世隔  
雖有父子無君臣  
漁郎漾舟迷遠近



花間相見因相問世上那知古有秦山中豈料今為晉  
聞道長安吹戰塵春風回首一霑巾重華一去寧復得  
天下紛紛經幾秦

送春

武陵山下朝買船風吹宿霧山花鮮萬家笑語橫青天  
綺窗羅幕舞嬋娟小鬟折花叩船舷玉琰瀉酒酬金錢  
朱甍飛動浮雲巘天外箴簫來宛轉斷橋人行夕陽路  
樓觀瑠璃影中現酡顏未分驂騑催燭入坐客猶徘徊

豈知閭闔門邊住春盡不見芳菲開日月紛紛車走坂  
少年意氣何由挽洞庭浪與天地白塵昏萬里東浮眼  
黑貂裘敝歸幾時相見綠樹啼黃鸝榮華俯仰憂患隨  
命駕吾與高人期

虎圖

壯哉非熊亦非羆目光夾鏡當坐隅橫行妥尾不畏逐  
顧盼欲去仍躊躇卒然我見心為動熟視稍稍摩其鬚  
固知畫者巧為此此物安肯來庭除想當槃礴欲畫時

睥睨衆史如庸奴神閒意定始一掃功與造化論錙銖  
悲風颯颯吹黃蘆上有寒雀驚相呼槎牙死樹鳴老烏  
向之俛噉如哺雞山牆野壁黃昏後馮婦遙看亦下車

陳橋

走馬黃昏渡河水夜爭歸路春風裏指點韋城太白高  
投鞭日午陳橋市場柳初回陌上塵胭脂洗出杏花勻  
紛紛塞路堪追惜失却新年一半春

離家

蒼黃離家問南北中路思歸歸不得風濤何處不驚人  
雨雪前村更欺客舊交旌旆此盤桓見我即令兒解鞍  
荒山樂官歌舞拙提壺沽酒聊一歡行藏欲語眉不展  
互歎別離心繾綣行年半百勞如此南畝催耕未宜晚

送程公闕守洪州

畫船插幟搖秋光鳴鏡傳鼓水洋洋豫章太守吳郡郎  
行指斗牛先過鄉鄉人出郭航酒漿魚鼈膾鯉炊稻粱  
茨頭肥大菱腰長醕醕喧呼坐滿床怪君三年滯瞿塘

又驅傳馬登太行纓旄脫盡歸大梁  
齟然出走天南疆  
九江左投貢與章揚濶吹漂浩無旁  
老蛟戲水風助狂  
盤渦忽折千丈強君聞此語悲慨慷  
迎吏乃前持一觴  
鄱州歷選多雋良鎮撫時有諸侯王  
拂天高閣朱鳥翔  
西山蟠繞鱗鬣蒼下視城塹真金湯  
雄樓傑屋鬱相望  
中戶尚有千金藏漂田種杭出穰穰  
沉檀珠犀雜萬商  
大舟如山起牙樯一本無此一句  
輸瀉交廣流荆揚輕裙利屐  
列名娼春風蹋謠能斷腸  
平湖灣塢煙渺茫樹石珍怪

花草香幽處往往聞笙簧地靈人秀古所臧勝兵可使  
酒可嘗十州將吏隨低昂談笑指麾回雨暘非君才高  
力方剛豈得跨有此一方無為聽客欲霑裳使君謝吏  
趣治裝我行樂矣未渠央

彭蠡

茫茫彭蠡春無地白浪春風濕天際東西拔柁萬舟回  
千歲老蛟時出戲少年輕事鎮南來水怒如山帆正開  
中流蜿蜒見脊尾觀者膽墮予方咤衣冠今日龍山路

廟下沽酒山前住老矣安能學飲飛買田欲棄江湖去  
葛蘊作巫山高愛其飄逸因亦作一篇

巫山高十二峯上有往來飄忽之猿猱下有出沒澆澗  
之蛟龍中有倚薄縹緲之神宮神人處子冰雪容吸風  
飲露虛無中千歲寂寞無人逢邂逅乃與襄王通丹崖  
碧嶂深重重白月如日明房櫳象牀玉几來自從錦屏  
翠幔金芙蓉陽臺美人多楚語祇有纖腰能楚舞爭吹  
鳳管鳴鼉鼓那知襄王夢時事但見朝朝暮暮長雲雨

陰漫漫行

愁雪怒風相追逐青山滅沒滄江覆少留燈火就空牀  
更聽波濤圍野屋憶昨踏雪度長安夜宿木瘤還苦寒  
誰云當春便妍暖十日八九陰漫漫

孤城

孤城回望

一作首

距幾何記得好處常經過最思東山煙

樹色更憶南湖秋水波百年顛倒如夢寐萬里乖隔徒

悲歌

一作萬事  
應感激

應須飲酒不復道今夜江頭明月多



送謝師宰赴任楚州

崑崙一支流向東七月八月船如風愛君少壯此行樂  
恨我留連成老翁神頭兩岸水無窮伏檻荷花滿地紅  
當時不得君攜手今日山川在眼中

到郡與同官

時倅舒州

瀉碧沄沄橫大郭浮蒼靄靄遙連閣草木猶疑夏鬱葱  
風雲已見秋蕭索荒歌野舞同醉醒水果山肴互酬酢  
自嫌多病少懽顏獨負嘉賓此時樂

復至曹娥堰寄剡縣丁元珍

溪水渾渾來自北千山抱水清相射山深水急無艇子  
欲從故人安可得故人昔日此水上樽酒扁舟慰行役  
津亭把手坐一笑我喜滿懷君動色論新講舊惜未足  
落日低回已催客離心自醉不復飲秋果寒花空滿席  
今年却坐相逢處惆悵難求別時迹可憐溪水自南流  
安得溪船問消息

韓持國從富并州辟

韓侯水玉人不可塵土襍官雖衆俊後名字久訇磕并  
州天下望撫士威愛愜千金棄不惜賓客常滿閣遙聞  
餘風高為子置一榻親交西門餞百馬驕襍還子材宜  
用世談者為鳴咤矧今名主人氣力足呵欲推賢為時  
輔勢若朽易拉會當薦還朝立予在閭闔惜哉秣騏驎  
賦以升龠合咨予栖栖者氣象已摧塌他年佐方州說  
將尚不納況於聲勢尊豈易取酬答有如持寸莛未足  
感鞢鞞顧於山水間意願多所合匡廬與韶石少小已

嘗跼風遊會稽春雲宿天柱臘淮湖江海上慣食蝦蟹  
蛤西南窮岷嶓東北盡濟漯身雖未嘗歷魂夢已稠沓  
荆溪最所愛映燭多廟塔溪果照丹漆溪花團繡菴扁  
舟信所過行不廢樽榼一從捨之去霜雪行滿類思之  
不能寐戚若蚩蚩嚙方將築其濱畢景謝嚙嗜安能孤  
此意顛倒就衰颯唯子余所嚮嗜好比鵝鰾何時歸相  
過遊屐尚可蠟

和平甫舟中望九華山

楚越千萬山雄奇此山兼盤根雖巨壯其末乃脩纖去  
縣尚百里側身勇前瞻蕭條煙嵐上縹緲浮青尖徐行  
稍復逼所矚亦已添精神去疊疊氣象來漸漸卸席取  
近岸移船傍蒼蒹窺觀坐窮晡未覺晷刻淹江空萬物  
息四面波瀾恬戢然九女鬟爭出一鏡匿卧送秋月沒  
起看朝陽暹游氛蕩無餘瑣細得盡覘陵空翠燾直照  
影寒鉅鉅冢木立紺髮崖林張紫髯變態生倏忽雖神  
詎能占當留老吾身少駐誰云饜惜哉秦漢君黃屋上

欽定四庫全書

宋景濂集  
卷七

衡瀟等之事嬉遊捨此何其廉我疑二后荒神物久已  
厭埋藏在雲霧不欲登昏憒又疑避褒封蔽匿以為謙  
或是古史書脫落簡與籤當時備巡遊今不在緗縑終  
南秦之望泰山魯所詹天王與秩祭俎豆羅醢鹽苟能  
澤下民維此遠亦沾方今東南旱土脈燥不黏尚無膚  
寸功豈免竊食嫌神莽吾難知士病吾能砭文章巧傅  
會智術工飛箱薦寶互珪璧論材自梗枲苟以飾婦妾  
謬云活蒼黔豈如幽人樂茲山謝閭閻穴石作戶牖垂

泉當門簾尋竒出後徑覽勝倚前簷超然往不返舉世徒  
咕咕高興寄日月千秋伴烏蟾遐追商洛翁秦火不能炎  
近慕楚穆生竟脫楚人鉗吾意竊所尚人誅諒難僉

寄贈胡先生

并序

孔孟去世遠矣信其聖且賢者質諸書焉耳翼  
之先生與予並世非若孔孟之遠也聞薦紳先  
生所稱述又詳於書不待見而後知其人也歎  
慕之不足故作是詩

先生天下豪傑魁胃臆廣博天所開文章事業望孔孟  
不復睥睨蔡與崔十年留滯東南州飽足藜藿安蒿萊  
獨鳴道德驚此民民之聞者源源來高冠大帶滿門下  
奮如百蟄乘春雷惡人沮服善者起昔時蹻跼今騫回  
先生不試乃能爾誠令得志如何哉吾願聖帝營太平  
補葺廊廟枝傾頽披旒發續廣耳目照徹山谷多遺材  
先收先生作梁柱以次構架桷與榱羣臣面向帝深拱  
仰戴堂陞方崔嵬



得曾子固書因寄

始吾居揚日重問每見及云將自親側萬里同講習子  
行何舒舒吾望已汲汲窮年夢東南顏色不可挹仁賢  
豈欺我正恐事維繫嚴親抱憂衰生理賴以給不然航  
江外天寒北風急無乃山路惡僕弱馬行澁孤懷未肯  
開歲物忽如蝨蛄來高郵住巷屋頗卑濕蓬蒿稍芟除  
茅竹隨補葺苟云禦風氣尚恐憂雨汁故人莫在眼屢  
獨開巾笈忠信蓋未見吾敢誣茲邑出闕誰與語念子

百憂集眺聽聊自放日暮城頭立徐歸坐當戶使者操  
書入時開識子意如渴得美湑驪駒日就道玉手行可  
執舊學待鐫磨新文得刪拾重登城頭望喜氣滿原隰

相送行效張籍

一車南一車北身世匆匆俱有役憶昔論心兩綢繆那  
知相送不得留但聞馬嘶覺已遠欲望應須上前坂秋  
風忽起吹泥塵雙目空回不見人

汴水

汴水無情日夜流不肯為我少淹留相逢故人昨夜去  
不知今日到何州州州人物不相似處處蟬鳴令客愁  
可憐南北意不就二十起家今白頭

憶蔣山送勝上人

蒼藤翠木江南山激激流水兩山間山高水深魚鳥樂  
車馬跡絕人長閑雲埋樵聲隔葱蒨月弄釣影臨潺湲  
黃塵滿眼衣可濯夢寐惆悵何時還

雲山詩送孫正之

雲山參差碧相圍溪水詰曲帶城隄溪翁壤斷至者誰  
予獨與子相諧嬉山城之西鼓吹悲水風蕭蕭不滿旗  
予今去此來何時予有不可誰予規

獨山梅花

獨山梅花何所似半開半謝荆棘中美人零落依草木  
志士顛顛守蒿蓬亭亭孤艷帶寒日漠漠遠香隨野風  
移栽不得根欲老回首上林顏色空

飛鴈

鴈飛冥冥時下泊稻梁雖少江湖樂人生何必慕輕肥  
辛苦將身到沙漠漢時蘇武與張騫萬里生還值偶然  
丈夫許國當如此男子辭親亦可憐

久雨

煤炰著天無寸空白沫上岸吹魚龍義和推車出不得  
河伯欲取山為宮城門晝開眠百賈饑孫得糟夜哺翁  
老人慣事少所怪看屋箕踞歌南風

寄朱昌叔

西安春風花幾樹花邊飲酒今何處一盃塞上看黃雲  
萬里寄聲無鴈去世事紛紛洗更新老來空得滿衣塵  
青山欲買江南宅歸去相招有此身

奉使道中寄育玉山長老常坦

道人少賈海上游海舶破散身沈浮抱金滿篋人所寄  
吹簫偶得還中州羸身歸金不受報祇取斗酒相獻酬  
歡娛慈母終一世脫棄妻子藏巖幽蒼煙寥寥池水漫  
白玉菡萏吹高秋夜燃栢子煮山藥憶此東望無時休

塞垣春枯積雪溜沙礫盛怒黃雲愁五更匹馬隨雁起  
想見鄮郭花今稠百年夸奪終一丘世上滿眼真悠悠  
寄聲萬里心綢繆莫道異趣無相求

欲歸

水漾青天暖沙吹白日陰塞垣春錯莫行路老侵尋綠  
稍還幽草紅應動故林留連一盃酒滿眼欲歸心

冬日

擾擾今非昔漫漫夜復晨風沙不貸客雲日欲迷人散

髮愁邊老開顏醉後春轉思江海上  
一洗白綸巾

將次洛州憇漳上

漠漠春風裏茸茸綠未齊  
平田鷗散啄深處馬迎嘶  
地入河流曲天隨日去低  
高城已在眼聊復解輕齋

宜春苑

宜春舊臺沼日暮一登臨  
解帶行蒼蘚移鞍坐綠陰  
樹踈啼鳥遠水靜落花深  
無復增修事君王惜費金

癸卯追感正月十五事



正月端門夜金輿縹緲中傳觴三鼓罷縱觀萬人同  
蹕聲如在嬉遊事已空但令千載後追詠太平功

次韻范景仁二五日夜風雪

何知此邂逅談笑接清揚對雪知春淺回燈惜夜長  
雲通炫晃殘月墮冥落故有臨邛客抽毫興未忘

次韻冲卿過睢陽

宮廟此神鄉留親泊楚艗天開今壯麗地積古悲涼  
不改山河舊猶餘草木荒還聞足賓客誰是漢鄒陽

崑山慧聚寺次張祐韻

峯嶺互出沒江湖相吐吞  
園林浮海角臺殿擁山根  
百里見漁艇萬家藏水村  
地偏來客少幽興祇桑門

暮春

春期行晚晚春意賸芳菲  
曲水應修禊披香未試衣  
雨花紅半墮煙樹碧相依  
悵望夢中地王孫底不歸

壬辰寒食

客思似楊柳春風千萬條  
更傾寒食淚欲漲冶城潮  
巾

髮雪爭出鏡顏朱  
早彫未知軒冕樂  
但欲老漁樵

招丁元珍

默默不自得  
紛紛何所為  
畫墁聊取食  
獵較久隨時  
秋入江湖暗  
風生草樹悲  
黃花一盃酒  
思與故人持

宿雨

綠攬寒蕪出紅爭  
暖樹歸魚吹塘水  
動鴈拂塞垣飛宿  
雨驚沙盡晴雲晝  
漏稀却愁春夢短  
燈火着征衣

即事

徑暖草如積山晴花更繁從橫一川水高下數家村靜  
憇雞鳴午荒尋犬吠昏歸來向人說疑是武陵源

鴈

北去還為客南來豈是歸倦投空渚泊饑帖冷雲飛垣  
柵雞長暖溝池驚自肥憐渠不知此更墮野人機

懷吳顯道

南郭紅亭冷西山白道曠江光凌翠氣洲色亂黃雲歲  
暮誰邀客情親故憶君天涯獨惆悵歸鳥黑紛紛

題齊安寺山亭

北山無躑躅故國有楊梅  
悵望心常折慙慙手自栽  
暮年逢火改晴日對花開  
萬里烏塘路春風自往來

北山暮歸示道人

千山復萬山行路有無間  
花發蜂遞繞果垂猿對攀  
獨尋寒水渡欲趁夕陽還  
天黑月未上兒童初掩關

華藏寺會故人得泉字

百憂成阻闊一笑得留連  
城郭西風裏園林落照前  
共

知官似夢莫負酒如泉興罷重攜手江湖即渺然

次韻昌叔歲暮

城雲漏日晚樹凍裏春深樛密魚雖暖巢危鶴更陰橫  
風高曠弩殘溜細鳴琴歲換兒童喜還傷老大心

春日

冉冉春行暮非非物競華鶯猶求舊友鶯不背貧家室  
有賢人酒門無長者車醉眠聊自適歸夢到天涯

遊賞心亭寄虔州女弟

秀發千峯霽清涵萬里秋  
滄江天上落明月鏡中流  
眼與魂俱斷身依影獨留  
為憐幽興極不見爾來遊

金山寺

重經高處寺一與白雲親  
樹木有春意江山如故人  
幽軒含氣象偏景落風塵  
日暮臨歸去徘徊欲損神

舟夜即事

火炬臨遙岸餘光照客船  
水明魚中餌沙暖鷺忘眠  
感慨無窮事遲回欲曉天  
山泉如有意枕上送潺湲

送孫子高

蕩漾江南客，融怡席上珍。  
一罇相別酒，千里獨歸人。  
客路貧堪病，交情遠更親。  
自慙兒女意，失淚滴衣巾。

送董傳

悠悠隴頭水，日夜向西流。  
行路未云已，歸人空復愁。  
文章合用世，顏髮未經秋。  
一聽秦聲罷，還來上國遊。

自白土村入北寺

雨過百泉出，秋聲連衆山。  
獨尋飛鳥外，時渡亂流間。  
坐



石偶成歇看雲相與還會須營一畝長聽此潺潺

題朱郎中白都莊

蕭灑桐廬守滄洲寄一塵山光隔釣岸江氣雜炊煙  
藜杖聽鳴鑪藍輿看種田明時須共理此興在他年

吳江

莽莽昔登臨秋風一散襟地留孤嶼小天入五湖深  
柑橘無千里魚鰕有萬金吾雖輕范蠡終欲此幽尋

江

靈源開闢有贏縮但相隨逆折山能礙奔流海與期泥  
沙圻蚌蛤雲雨暗蛟螭欲問深何處馮夷祇自知

遊杭州聖果寺

登高見山水身在水中央下視樓臺起空多樹木蒼浮  
雲連海氣落日動湖光偶坐吹橫笛殘聲入富陽

江上

潮連風浩蕩沙引客淹留落日更清坐空江無近舟共  
看葭葦宅聊即稻粱謀未敢嗟艱食凶年半九州

仁宗皇帝挽辭

馮几微言絕羣臣涕泗揮哀號三級陞縞素九重圍天上仙遊遠宮中御座非最悲帷幄侍不復未明衣

神宗皇帝挽辭

城闕宮車轉山林隧路歸蒼梧雲未遠姑射露先晞玉暗蛟龍蟄金寒鴈鷺飛老臣他日淚湖海想遺衣

王逢原挽辭

蒿里竟何在死生從此分謾傳仙掌籍誰見鬼修文蔡

琰能傳業侯芭為起墳傷心北風路吹淚濕江雲

擬和御製賞花釣魚

雲暖蓬萊日風酣太液春水光承步輦花氣入鈎陳伏  
檻留清蹕傳觴屬從臣霏香連釣餌落葉亂游鱗鎬飲  
恩知厚衢樽賜願均更看追夏諺先此詠逢辰

見遠亭上王郎中

高亭豁可望朝暮對谿山野色軒楹外霞光几席間樹  
侵蒼靄沒烏背夕陽還草帶平沙闊煙籠別戍閒圓畦

荷氣合田徑燒痕斑樵笛吟晴塢漁帆出暝灣登臨及  
芳節宴喜發朱顏夾砌陳旌旒褰簾進佩環觀風南國  
最應宿紫宸班康樂詩名舊蕪音詎可攀

和御製賞花釣魚

陰幄晴雲拂曉開傳呼仙仗九天來披香殿上留朱輦  
太液池邊送玉杯宿藥暖含風浩蕩戲鱗清映日徘徊  
宸章獨與春爭麗思許賡歌豈易陪

御溝

渺渺金河漲欲平  
數枝分綠報清明  
常縈輦路漂花去  
更引流杯送酒行  
靜見金輿穿樹影  
清含玉漏過牆聲  
衰顏一照自多感  
迴首江南春水生

長干寺

梵館清閒側布金  
小塘回曲翠文深  
柳條不動千絲直  
荷葉相依萬蓋陰  
漠漠岑雲相上下  
翩翩沙鳥自浮沉  
羈人樂此忘歸思  
忍向西風學越吟

葛溪驛

缺月昏昏漏未央一燈明滅照秋牀  
病身最覺風霜早歸夢不知山水長  
坐感歲時歌慷慨起看天地色淒涼  
鳴蟬更亂行人耳正抱疎桐葉半黃

爲裴使君賦擬峴臺

君作新臺擬峴山羊公千載得追攀  
歌鍾殷地登臨處花木移春指顧間  
城似大隄來宛宛溪如清漢落潺潺  
時平不比征吳日緩帶尤宜向此閒

送西京簽判王著作

兒曹曾上洛城頭尚記清波遶驛流却想山川常在夢  
可憐顏髮已驚秋辟書今日看君去著籍長年嘆我留  
三十六峯應好在寄聲多謝欲來遊

寄朱昌叔

清江漫漫遶城流尚憶城邊繫小舟射虎未能隨李廣  
割雞空欲戲言游雲埋塞路驚塵合霜入春風滿鬢愁  
此日君書苦難得漫多鴻鴈起南洲

次韻答丁端州



莫嗟荒僻又離羣且喜風謠嶺北聞  
銅柱雖然蠻徼接竹符還是漢家分  
春書來逐衡陽鴈秋騎歸看隴首雲  
相見會知南望苦病骸今似沈休文

次韻舍弟賞心亭即事

霸氣消磨不復存舊朝臺殿祗空村  
孤城倚薄青天近細雨侵凌白日昏  
稍覺野雲成晚霽却疑山月是朝暾  
此時江海無窮興醒客忘言醉客喧

登中茅山

翛然杖屨出塵囂雞犬無聲到次寥欲見五芝莖葉老  
尚攀三鶴羽翰遙容谿路轉迷橫杓仙凡風來得墮樵  
興罷日斜歸亦懶更磨碑辭認前朝

午枕

百年春夢去悠悠不復吹簫向此留野草自花還自落  
鳴禽相乳亦相酬舊蹊埋沒開新徑朱戶敲斜見畫樓  
欲把一盃無伴侶眼看興廢使人愁

太湖恬亭

檻臨溪上綠陰圍溪岸高低入翠微日落斷橋人獨立  
水涵幽樹鳥相依清遊始覺心無累靜處誰知世有機  
更待夜深同徙倚秋風斜月釣船歸

次韻酬吳彥珍見寄

君作新詩故起予一吟聊復報雙魚杖藜高徑誰來往  
散帙空堂自卷舒樹外鳥啼催晚種花間人語趁朝虛  
春風處處堪攜手何事臨池苦學書

自金陵如丹陽道中有感

數百年來王氣消難將前事問漁樵苑方秦地皆蕪沒  
山借揚州更寂寥荒隄暗難催月晚空場老雉挾春驕  
豪華祇有諸陵在往往黃金出市朝

除夜寄舍弟

一尊聊有天涯憶百感翻然醉裏眠酒醒燈前猶是客  
夢回江北已經年佳時流落真何得勝事蹉跎只可憐  
唯有到家寒食在春風因泛潁溪船

送許覺之奉使東川

三秋不見每惓惓握手山林復悵然後會敢期黃耆日  
相看且度白雞年畏途石棧王尊馭榮路金門祖逖鞭  
一代官儀新藻拂得瞻宸宇想留連

寄題程公闢物華樓

吳楚東南最上遊江山多在物華樓遙瞻旌節臨樽俎  
獨卧柴荆阻獻酬想有新詩傳素壁怪無餘墨到滄洲  
渦淞南望重重綠章水還能向此流

次韻吳季野題岳上人澄心亭

空亭五月尚寒生回首塵沙自鬱蒸  
砌水亂流穿石底檻雲高出蔽山層  
躋攀欲絕人間世締構知從物外僧  
腸胃坐來清似洗神奇未怪佛圖澄

寄張先郎中

留連山水住多時年比馮唐未覺衰  
篝火尚能書細字郵筒還肯寄新詩  
胡牀月下知誰對蠻榼花前想自隨  
投老主恩聊欲報每瞻高躅恨歸遲

送裴如晦宰吳江

青髮朱顏各少年  
幅巾談笑兩歡然  
柴桑別後餘三徑  
天祿歸來盡一廛  
邂逅都門誰載酒  
蕭條江縣去鳴弦  
猶疑甫里英靈在  
到日憑君為艤船

丁年

丁年結客盛遊從  
宛洛輶車處處逢  
吟盡物華愁筆老  
醉消春色愛醅濃  
壚間寂寞相如病  
鍛處荒涼叔夜慵  
早晚青雲須自致  
立談平取徹侯封

愁臺

頽垣斷塹有平沙老木荒榛八九家河勢東南吹地坼  
天形西北倚城斜傾壺語罷還登眺岸幘詩成却嘆嗟  
萬事因循今白髮一年容易即黃花

垂虹亭

坐覺塵襟一夕空人間似得羽翰通暮天窈窕山街日  
爽氣駸駸客御風草木韻沉高下外星河影落有無中  
飄然更待乘桴伴一到扶桑興未窮

送遜師歸舒州



山川相對一悲翁  
往事紛紛夢寐中  
邂逅故人恩意在  
低徊今日笑言同  
看吹陌上楊花滿  
忽憶巖前蕙帳空  
亦見桐鄉諸父老  
為傳衰颯病春風

送李璋

湖海聲名二十年  
尚隨鄉賦已華顛  
却歸甫里無三徑  
擬傍胥山就一廛  
朱轂風塵休悵望  
青鞋雲水且留連  
故人一見如相問  
為道方尋木鴈篇

次韻酬宋玘

二首

城中燈火照青春遠引吾方避糾紛  
遊行水邊追野馬  
嘯歌林下應山君  
愁尋徑草無求仲  
喜對簷花有廣文  
邂逅一樽聊酹酌  
聲名身後豈須聞

二

無能私願祇求田  
時物安能學計然  
鑿井未能歌擊壤  
射熊猶得夢鈞天  
遙思故國歸來日  
留滯新恩已去年  
攜手與君遊最樂  
春風陂上水濺濺

寄余溫卿

雲散風流不自禁天涯無路盡朋簪空馳上國青泥信  
誰和南山白石音平日離愁寬帶眼訖春歸思滿琴心  
終回一命翩翩駕獨過稽山鍛樹陰

酬淨因長老樓上翫月見懷有疑君魂夢在清都  
之句

道人心與世無求隱几蕭然在此樓坐對高梧傾曉月  
看翻清露洗新秋登臨更欲邀元亮披寫還能擬惠休  
顧我不知天上樂虛疑昨夜夢仙遊

次韻平甫金山會宿寄親友

天末海門橫北固，煙中沙岸似西興。  
已無船舫猶聞笛，遠有樓臺祇見燈。  
山月入松金破碎，江風吹水雪崩騰。  
飄然欲作乘桴計，一到扶桑恨未能。

次御河寄城北會上諸友

客路花時祇攪心，行逢御水半晴陰。  
背城野色雲邊盡，隔屋春聲樹外深。  
香草已堪回步履，午風聊復散衣襟。  
憶君載酒相追處，紅萼青跗定滿林。

藏春塢詩獻刁十四文學士

蒜山東渡得林丘邂逅籃輿亦少留  
今日更知萊氏隱暮年長憶武陵遊  
欲營垣屋隨穿斲尚歎塵沙隔獻酬  
遙約向吳亭下路春風深駐五湖舟

文元賈公挽辭

銘旌蕭颯九秋風薤露悲歌落月中  
華屋幾人思賈傅佳城今日閉滕公  
名垂竹帛書勲在神寄丹青審象同  
天上貂蟬曾夢賜歸魂應佩紫陽宮

河中使君修撰陸公挽辭

晚城初得故人詩，嘆息龍媒踠壯時。  
太史滯留終不偶，中郎制作遂無施。  
二千石祿今何有，四十車書昔漫知。  
海曲冷雲埋拱木，延州空掛暮年悲。

午睡

簷日陰陰轉牀風，細細吹翛然殘午夢何許。  
一黃鸝

山中

隨月出山去，尋雲相伴歸。  
春晨花上露，芳氣著人衣。

送王補之行風忽作因題四句於舟中

淮口西風急君行定幾時故應今夜月未便照相思

南浦

南浦隨花去迴舟路已迷暗香無覓處日落畫橋西

江上

江水漾西風江花脫晚紅離情被橫笛吹過亂山東

雜詠

四首

故畦拋汝水新壟寄鍾山為問揚州月何時照我還

卷七  
二

已作湖陰客如何更遠遊  
漳江昨夜月送我到揚州

三

證聖南朝寺三年到百回  
不知檣下路今日幾荷開

四

桃李石城塢餉田三月時  
柴荆常自閉花發少知人

春晴

新春十日雨雨晴門始開  
靜看蒼苔紋莫上人衣來



別方邵秘校

迢迢建業水中有武昌魚別後應相憶能忘數寄書

梅花

牆角數枝梅凌寒獨自開遙知不是雪為有暗香來

紅梅

春半花纔發多應不奈寒北人初未識渾作杏花看

春郊

青秧漫漫出初齊雞犬遙聞路却迷但見山花流出水

那知不是武陵溪

竹裏

竹裏編茅倚石根  
竹莖疎處見前村  
閒眠盡日無人到  
自有春風為掃門

木末

木末北山煙冉冉  
草根南澗水泠泠  
縹成白雪桑重綠  
割盡黃雲稻正青

送方劭秘校

南浦柔條拂地垂  
攀翻聊寄我西悲  
武昌官柳年年好  
他日春風憶此時

北山

北山輸綠漲橫陂  
直壑回塘灩灩時  
細數落花因坐久  
緩尋芳草得歸遲

江寧夾口

鍾山咫尺被雲埋  
何況南樓與北齋  
昨夜月明江上燕  
逆隨潮水到秦淮

寄蔡天啟

杖屨緣塹復穿橋誰與高秋共寂寥佇立東岡一搔首  
冷雲衰草暮迢迢

書湖陰先生壁

二首

茆簷長掃靜無苔花木成畦手自栽一水護田將綠繞  
兩山排闥送青來

綠條索漠柳花繁風飲餘香暗度垣黃鳥數聲殘午夢  
尚疑身屬半山園

示俞秀老

不見故人天際舟小亭殘日更回頭  
縹成白雪三千丈  
細草孤雲一片愁

望淮口

白煙瀰漫接天涯黯黯長空一道斜  
有似錢塘江上望  
晚潮初落見平沙

金陵即事

水際柴門一半開小橋分路入青苔  
背人照影無窮柳

隔屋吹香併是梅

午枕

午枕花前簟欲流  
日催紅影上簾鉤  
窺人鳥喚悠颺夢  
隔水山供宛轉愁

鍾山即事

澗水無聲遠竹流  
竹西花草弄春柔  
茅簷相對坐終日  
一鳥不鳴山更幽

日西

日西階影轉梧桐簾卷青山簾半空金鴨火銷流水冷  
悠悠殘夢鳥聲中

禁中春寒

青煙漠漠雨紛紛水殿西廊北苑門已著單衣猶禁火  
海棠花下怯黃昏

楚天

楚天如夢水悠悠花底殘紅漫不收獨繞去年揮淚處  
還將牢落對滄洲

春江

春江渺渺抱牆流  
煙草茸茸一片愁  
吹盡柳花人不見  
青旗催日下城頭

過外弟飲

一日君家把酒盃  
六年波浪與塵埃  
不知烏石岡邊路  
至老相尋得幾回

定林

定林青木老參天  
橫貫東南一道泉  
六月杖藜尋石路



午陰多處弄潺湲

出塞

涿州沙上飲盤桓  
看舞春風小契丹  
塞雨巧催燕淚落  
濛濛吹濕漢衣冠

入塞

荒雲涼雨水悠悠  
鞍馬東西鼓吹休  
尚有燕人數行淚  
回身却望塞南流

遇雪

定知花發是歸期不柰歸心日日歸風雪豈知行客恨  
向人更作落花飛

訪隱者

童子穿雲晚未歸誰收松下着殘碁先生醉卧落花裏  
春去人間總不知

雜詠

白頭重到太寧宮玉珮瓊琚在眼中歌舞可憐人暗換  
花開花落幾春風

獨卧

茅簷午影轉悠悠  
門閉青苔水亂流  
百轉黃鸝看不見  
海棠無數出牆頭

別和甫赴南徐

都城落日馬蕭蕭  
雨壓春風暗柳條  
天際歸艎那可望  
只將心寄海門潮

遊鍾山

兩山松櫟暗朱藤  
一水中間勝武陵  
午夢隔雲知有寺

夕陽歸去不逢僧

春日席上

十年流落負歸期  
臨水登山各有思  
今日樽前千萬恨  
不堪頻唱鷓鴣詞

中茅峯石上徐錯篆字題名

百年風雨草苔昏  
尚有當年墨法存  
祇恐終隨嶧碑盡  
西風吹燒滿秋原

悟真院

野水從橫漱屋除  
午窗殘夢鳥相呼  
春風日日吹香草  
山北山南路欲無

鍾山晚步

小雨輕風落棟花  
細紅如雪點平沙  
槿籬竹屋江村路  
時見宜城賣酒家

江寧府園示元度

畫船南北水遙通  
日暮幅巾篁竹中  
行到月臺逢翠碧  
背人飛過子城東

八爪步望揚州

落日平林一水邊  
蕪城掩映祇蒼然  
白頭追想當年事  
幕府青衫最少年

州橋

州橋蹋月想山椒  
迴首哀湍未覺遙  
今夜重聞舊鳴咽  
却看山月話州橋

六年

六年湖海老侵尋  
千里歸來一寸心  
西望國門搔短髮

九天宮闕五雲深

若耶溪歸興

若耶溪上踏莓苔興罷張帆載酒回汀草岸花渾不見  
青山無數逐人來

試院中

白髮無聊病更侵移牀卧竹向秋陰朝來鴈背西風急  
吹折江湖萬里心

前題

蕭蕭疎雨吹簷角  
噎噎暝蛩啼草根  
閑却荒庭歸未得  
一燈明滅照黃昏

暮春

無限殘紅着地飛  
谿頭煙樹翠相圍  
楊花獨得東風意  
相逐晴空去不歸

松江

來時還似去時天  
欲道來時已惘然  
祇有松江橋下水  
無情長送去來船



贈安太師

獨龍岡北第三峯  
通客歸來老更慵  
敗屋數椽青繚繞  
冷雲深處不聞鐘

題西太一宮壁

草色浮雲漠漠樹陰落日潭潭  
三十六陂春水白頭想見江南

西太一宮樓

草際芙蓉零落水邊楊柳欹斜  
日暮炊烟孤起不知漁

網誰家

古意

采芝天門山寒露淨毛骨帝青九萬里空洞無一物傾  
河略西南鼎射河鼓沒蓬萊眼中見人世嘆超忽當時  
棄桃核聞已掌月窟且當呼阿環乘興弄溟渤

秋夜泛舟

池塹秋水淨扁舟遡涼颼的皪荷上珠俯映疎星搖深  
尋畏魚淦中道只回橈冥冥菰蒲中乃復有驚跳

朝日一暴背

朝日一暴背欣然忘夜寒  
樵松煮澗水既食取琴彈  
彈作南風歌歌罷坐長嘆  
寤彼栖栖者遺世良獨難

牧笛

綠草無端倪牛羊在平地  
芊綿杳靄閒落日一橫吹  
超遙送逸響誕漫寫真意  
豈比賣錫人吹簫販童穉

寄曾子固

吾少莫與合愛我君為最  
君名高山嶽嶺崇嵩與泰低

心收菴友似不讓塵壚又如滄江水不逆溝畎澮君身  
揭日月遇輒破氛靄我材特窮空無用補倉廩謂宜從  
君久垢污得淘汰人生不可必所願每顛沛乖離五年  
餘牢落千里外投身落俗穽薄宦自鉗鉉平居每自守  
高論從誰丐摇摇西南心夢想與君會思君挾奇璞願  
售無良僧窮閭抱幽憂凶禍費襁褓州窮吉士少誰可  
壻諸妹仍間病連月醫藥誰可賴家貧奉養狹誰與通  
貨貝詩人刺曹公賢者荷戈殺柰何遭平時德澤盛汪

濺鸞鳳鳴上下萬羽來翩翩  
呦呦林門鹿爭出噬羊藟  
乃令高世士動輒遭狼狽  
人事既難了天理尤茫昧  
聖賢多如此自古云無奈  
周人貴婦女扁鵲名醫癘  
今世無常勢趨舍惟利害  
而君信謀道不問身窮泰  
棄捐人間樂濯耳受天籟  
諒知安肥甘未肯顧糠粃  
龍螭雖蟠屈不慕蛇蟬蛻  
令人重感奮意勇忘身最  
何由日親炙病體同砭艾  
功名未云合歲月尤須惕  
懷思切劇效中夜淚霑霑  
君嘗許過我早晚治車軌  
山蹊雖峻惡高眺

發蒙肺峰巒碧參差木樹青掩鵲桐江路尤駛飛漿下  
鳴瀨魚村指暮火酒舍瞻晨旆清醪足消憂玉鯽行可  
膾行行願無留日夕佇傾蓋會將見顏色不復謀著蔡  
延陵古君子議樂恥言鄒細事豈足論故欲論其大披  
披發韃橐懍懍見戈銳探深犯嚴壁破惑翻強檜離行  
步荃蘭偶坐陰松檜宵牀連衾幃晝食共麕羶茲歡何  
時合清瘦見衣帶作詩寄微誠誠語無綵繪

泊舟姑蘇

朝遊盤門東暮出閭門西四顧茫無人但見白日低荒  
林帶昏烟上有歸鳥啼物皆得所託而我無安棲

崑山慧聚寺次孟郊韻

僧蹊蟠青蒼莓苔上秋牀露翰飢更清風葩遠亦香

陸機宅

故物一已盡嗟此年歲深野桃自着花荒棘自生鍼芊  
芊谷水陽鬱鬱崑山陰俛仰但如昨遊者不可尋

元豐行示德逢

四山脩脩映赤日田背坼如龜兆出湖陰先生坐草室  
看踏溝車望秋實雷蟠電掣雲滔滔夜半載雨輸亭臯  
旱禾秀發埋牛尻豆死更蘇肥莢毛倒持龍具挂屋敖  
買酒澆客追前勞三年五穀賤如水今見西成復如此  
元豐聖人與天通千秋萬歲與此同先生在野故不窮  
擊壤至老歌元豐

純甫出釋惠崇畫要予作詩

畫史紛紛莫足數惠崇晚出吾最許旱雲六月漲林莽



移我翛然墮沙渚黃蘆低摧雪翳土鳬鴈靜立將儔侶  
往時所立今在眼沙平水澹西江浦暮氣沉舟暗魚罟  
欹眠嘔軋如聞榜頗疑道人三昧力異域山川能斷取  
方諸承水調幻藥灑落生綃變寒暑金坡巨然山數堵  
粉墨空多真漫與大梁崔白亦善畫曾見桃花淨初吐  
酒酣弄筆起春風便恐漂零作紅雨流鶯探枝婉欲語  
蜜蜂掇藥隨翅股一時二子皆絕藝裘馬穿羸久羈旅  
華堂豈惜萬黃金苦道今人不如古

春日曉行

門前楊柳二三月枝條綠煙花白雪呼僮羈我果下騮  
欲尋南岡一散愁綠岡初日溝港淨與我門前綠相映  
隔淮仍見裊裊垂佇立怊悵去年時杏花園西光宅路  
草暖沙晴正好渡興盡無人檝迎我却隨倦鷗歸薄暮  
獨歸

鍾山獨歸雨微冥稻畦夾岡半黃青疲農心知雨未足  
看雲倚木車不停悲哉作勞亦已久暮歌如哭難為聽

而我官閒幸無事北窗枕簟風泠泠於時荷花擁翠蓋  
細浪颺雪千娉婷誰能歌眠共此樂秋港雖淺可揚舠

陰山畫虎圖

陰山健兒鞭鞞急走勢能追北風及逶迤一虎出馬前  
白羽橫穿更人立回旗倒戟四邊動抽矢當前放蹄入  
爪牙蹭蹬不得施磧上流丹看來濕霜天朔漠殺氣高  
煙雲萬里埋弓刀穹廬無工可貌此漢使自解丹青色  
堂上絹素開欲裂一見猶能動毛髮低徊使我思古人

此地搏兵幾勝負秦關漢月空蕭然豈若封疆今晏眠  
契丹弋獵漢耕作飛將自老南山邊還能射虎隨少年

塞翁行

塞翁少小壟上鋤塞翁老來能捕魚魚長如人水滿眼  
桑柘死盡生芙蓉漢家新堤廣能築蕃兒壯馬休南牧  
北風卷却波浪生祇放田車行輾轉

寄鄂州張使君

昔人寧飲建業水共道不食武昌魚公來建業每自如

亦復不厭武昌居武昌山川今可想綠水逶迤煙蒼莽  
白鷗晴飛隨兩漿岸薺薺映魚網投老留連陌上塵  
思公一語何由往

九井

沿崖涉澗三十里高下聲確無人耕捫蘿挽葛到山趾  
仰見吹瀉何崢嶸餘聲投林欲風雨末勢卷土猶溪阮  
飛蟲凌兢走獸慄霜雪夏落雷冬鳴野人往往見神物  
鱗甲漠漠雲隨行我來立久無所得空數石上菖蒲生

中官繫龍沉玉冊小吏磔狗澆銀觥地形偶爾藏險怪  
天意未必司陰晴山川在理有崩竭丘壑自古相虛盈  
誰能保此千世後天柱不折泉常傾

書會別亭

西城路居人送客西歸處年年借問去何時今日扁舟  
從此去春風吹花落高枝飛來飛去不自知路上行人  
亦如此應有重來此處時

太白嶺

太白巖從東南馳衆嶺環合青紛披煙雲厚薄皆可愛  
樹石疎密自相宜陽春已歸鳥語樂溪水不動魚行遲  
生民何由得處所與茲魚鳥相諧熙

草堂

草堂今寂寞往事翳山椒蕙帳空留鶴蘿衣終換貂生  
皆墮天裘隱或寄公朝疊穎何勞怒東風汝自搖

送吳叔開南征

摻袂不勝情犀舟擊汰行倦遊無萬里惜別有千名春

草淒淒綠江風湛湛青金陵多麗景此去屬蘭成

秋興和冲卿

雲浮朝慘淡風起夜颼颼欲作冰霜地先迴草樹秋  
征人倚笛怨思婦向砧愁為問隨陽鴈哀鳴豈有求

沂澤懷正之

故人何處所天角浪漫漫寂寞斷音驛徘徊愁肺肝  
世情紛可怪旅況浩難安願化東南鵠高飛託羽翰

次韻元厚之平戎慶捷



朝廷今日四夷功先以招懷後殪戎羌地馬牛歸隴底  
漢人煙火起湟中投戈更講諸儒藝免胄爭趨上將風  
文武佐時慚吉甫宣王征伐自膚公

王安國九首

九江琵琶亭

夜泊潯陽宿酒樓琵琶亭畔荻花秋雲沉烏沒事已往  
月白風清江自流

送客西陵

若耶溪畔醉秋風  
獵獵船旗照水紅  
後夜錢塘酒樓上  
夢魂應遶浙江東

假寐

計較平生分閉關  
偶然容得近人寰  
春風池沼魚兒戲  
暮雨樓臺燕子閒  
假寐塵侵黃卷上  
行吟花墮綠苔間  
了無一事撿方寸  
自是顏齡合鬢斑

金明池

霓裳遠遠拂樓船  
滿地春風錦繡筵  
三島路深浮閬苑

九霞觴滿奏鈞天，仗歸金闕浮雲外。  
人望池臺落日邊，最引平生江海趣。  
波瀾一段草如煙。

西湖春日

爭得才如杜牧之，試來湖上輒題詩。  
春煙寺院敲茶鼓，夕照樓臺卓酒旗。  
濃吐雜芳薰巖崿，濕飛雙翠破連漪。  
人間幸有蓑兼笠，且上漁舟作釣師。

記夢

萬頃波濤木葉飛，笙簫宮殿號靈芝。  
揮毫不似人間世。

長樂鐘聲夢覺時

次韻景文雪中見寄

未能談笑破愁城，猶幸都無俗事撓。  
載酒何人過揚子，評詩今日得鍾嶸。  
杜門落寞塵埃隔，掃徑侵尋霜雪生。  
誰向梁園能授簡，看君文格出天成。

滕王閣

滕王平昔好追遊，高閣依然枕碧流。  
勝地幾經興廢事，夕陽偏照古今愁。  
層城樹密千家笛，江渚人孤一葉舟。

帳望滄波吟不盡西山重壓亂雲浮

再作

地勢遠迂徐孺亭穹南有客兩曾經簷前燕雀鳴相鬪  
潭裏蛟龍困未醒亂靄蒼茫迷樹色驚濤浩蕩失天形  
當時好景無同賞對此悲歌孰為聽



宋藝圃集卷七







欽定四庫全書

集部  
宋藝圃集卷八

詳校官中書<sub>臣</sub>陸 湘

侍讀<sub>臣</sub>孫球覆勘

總校官庶吉士<sub>臣</sub>何思鈞

校對官編修<sub>臣</sub>李堯棟

謄錄監生<sub>臣</sub>李元位

欽定四庫全書

宋藝圃集卷八

明 李袁 編

陳與義八十四首

別伯共

樽酒相逢地江楓欲盡時猶能十日客共出數年詩供  
世無筋力驚心有別離好為南極柱深慰旅人思

中道寒食

斗粟淹吾駕浮雲笑此生有詩酬歲月無夢到功名客  
裏逢歸鴈愁邊又亂鶯楊花不解事更作倚風輕

美哉亭

西出成臯關土谷僅容駝天掛一足練雙闕闕嵯峨忽  
然五丈缺高構如危窠青山麗中原白日照大河下視  
萬里川草木何其多臨高一吐氣却柰雄風何辛苦一  
生快造物巧揣摩險易終不償翻身下殘坡

試院書懷

細讀平安字愁邊失歲華踈踈一簾雨  
淡淡滿枝花投老詩成癖經春夢到家  
茫然十年事倚杖數棲鴉

雨

沙岸殘春雨茅簷古鎮官一時花帶淚  
萬里客憑欄日晚薔薇重樓高燕子寒  
惜無陶謝手盡日破憂端

春雨

花盡春猶冷羈心只自驚孤鶯啼永晝  
細雨濕高城擾擾成何事悠悠送此生  
蛛絲閃夕霽隨處有詩情

雨

雲起谷全曙雨晴山復明  
青春望中色白澗晚來聲  
遠樹烏羣集高原人獨耕  
老夫逃世久堅坐聽陰晴

細雨

避寇煩三老那知是勝遊  
平湖受細雨遠岸送輕舟  
天地悲深阻山川慰久留  
參差發鄰舫未覺壯心休

晚步

畎畝意不適出門聊散休  
雨餘山欲近春半水爭流  
衆

籟夕還作孤懷行轉幽溪西篁竹亂微徑散歸牛

雨思

小閣當橋木清溪抱竹林寒聲日暮起客思雨中深行  
李妨幽事闌干試獨臨終然遊子意非復昔人心

雨中

北客霜侵鬢南州雨送年未聞兵革定從使歲時遷古  
澤生春靄高空落暮鳶山川含萬古鬱鬱在樽前

渡江

卷八  
江南非不好楚客自生哀  
搖櫂天平渡迎人樹欲來  
雨餘吳岫立日照海門開  
雖異中原險方隅亦壯哉

岸幘

岸幘立清曉山頭生薄陰  
亂雲交翠壁細雨濕青林  
時改客心動鳥鳴春意深  
窮鄉百不理時得一閑吟

放慵

暖日薰楊柳濃春醉海棠  
放慵真有味應俗苦相妨  
官拙從人笑交疎得自藏  
雲移穩扶杖燕坐獨焚香

傷春

廟堂無策可平戎，坐使甘泉照夕烽。  
初怪上都聞戰馬，豈知窮海望飛龍。  
孤臣霜髮三千丈，每歲煙花一萬重。  
稍喜長沙向延閣，疲兵敢犯虎狼鋒。

懷天經知老因以訪之

今年二月凍初融，睡起蒼溪綠向東。  
客子光陰詩卷裏，杏花消息雨聲中。  
西庵禪伯還多病，北柵儒先只固窮。  
忽憶輕舟尋二子，綸巾鶴氅試春風。



次韻謝呂居仁居仁時寓賀州

別君不覺歲時荒  
豈意相逢魑魅鄉  
篋裏詩書總寥落  
天涯形貌各昂藏  
江南今歲無烽火  
嶺表窮冬有雪霜  
尚可卜鄰吾欲住  
草茆為蓋竹為梁

與大光同登封州小閣

去程欲數莽難知  
三日封州更作遲  
青嶂足稽天下士  
錦囊今有嶠南詩  
共登小閣春風裏  
回望中原夕靄時  
萬本梅花為我壽  
一杯相屬未全癡

次韻伊潛感懷

烽烟又看遶淮春  
嘆息猶為國有人  
可使翠華周寓縣  
誰持白扇靜風塵  
五年天地無窮事  
萬里江湖見在身  
共說金陵龍虎氣  
放臣迷路感烟津

除夜

城中爆竹已殘更  
朔吹翻江意未平  
多事鬢毛隨節換  
盡情燈火向人明  
比量舊歲聊堪喜  
流轉殊方又可驚  
明日岳陽樓上去  
島煙湖霧看春生

登岳陽樓

洞庭之東江水西，  
簾旌不動夕陽遲。  
登臨吳蜀橫分地，  
徙倚湖山欲暮時。  
萬里來遊還望遠，  
三年多難更憑危。  
白頭弔古風霜裏，  
老木蒼波無限悲。

望燕公樓下李花

燕公樓下繁華樹，  
一日遙看一百回。  
羽蓋夢餘當晝立，  
綈衣風急過牆來。  
洛陽路不容春到，  
南國花應為客開。  
今日豈堪簪短髮，  
感時傷舊意難裁。

有感再賦

憶得佳辰重九日天恩曾預宴城東  
龍沙此日西風冷誰折黃花壽兩宮

和張矩臣水墨梅

粲粲江南萬玉妃別來幾度見春歸  
相逢京洛渾依舊惟恨緇塵染素衣

自讀西湖處士詩年年臨水愛幽姿  
晴窗畫出橫斜影絕勝前村夜雪時

題唐希雅畫寒江圖

江頭雲黃天醞雪樹枝慘慘凍欲折耐寒野鴉不知歸  
猶向沙邊弄羽衣黃茅終日不自力影亂弱藻相因依  
唯有蒼石如卧虎不受陰晴與寒暑舟中過客莫敢侮  
閒伴長江了今古

江南春

雨後江上綠客悲隨眼新桃花十里影搖蕩一江春朝  
風逆船波浪惡暮風送船無處泊江南雖好不如歸老

薺遶牆人得肥

西風

木末西風起中含萬里涼浮雲不愁思盡日只飛揚夢  
斷頭將白詩成葉自黃不關明主棄本出涸陰鄉

題小室

暫脫朝衣不當閒澶州夢斷已多年諸公自致青雲上  
病客長齋繡佛前隨意時為獅子卧安心懶作野狐禪  
爐烟忽散無踪跡屋上寒雲自黯然

寄若拙弟兼呈二十家叔

退之送窮窮不去樂天待富富不來政須青山映黑髮  
顧著皂蓋爭黃埃何如父子共一壺龐家活計良不惡  
阿奴況自不碌碌白鷗之盟可同諾三間瓦屋亦易求  
著子東頭我西頭中間共作老萊戲世上樂復有此不  
問夢膏肓應已瘳歸來歸來無久留竹林步兵非俗流  
為道此意思同遊

連雨賦書事

三首

九月逢連雨瀟瀟穩送秋龍公無乃倦客子不勝愁雲  
氣昏城壁鐘聲咽寺樓年年授衣節牢落向他州

二

風伯方安卧雲師亦少餐氣連河漢潤聲到竹窗高老  
鶴尤貪去寒蟬遂不號相悲更相識滿眼楚人騷

三

白菊生新紫黃蕪失舊青但含歲晚恨併入夜深聽夢  
寐連蕭索更籌亂晦冥雲移過吳越應為洗餘醒



秋夜

中庭淡月照三更  
白露洗空河漢明  
莫遣西風吹葉盡  
却愁無處著秋聲

為陳介然題持約畫

層層水落白灘生  
萬里征鴻小作程  
日落微風過荷葉  
陂南陂北聽秋聲

寄題兗州孫大夫絕塵亭

二首

不讀遠遊賦  
放懷茲地宜  
雲山遶窗戶  
萬態爭紛披  
世

故日已遠風水方逶迤倚杖夜來雨東山烟散遲人間  
許長史不與此心期

境空納浩蕩日暮生沈寥竹聲池邊起欲斷還蕭蕭文  
人方微吟萬象各動搖林間光景異月出東山椒門前  
誰剝啄已逝不須邀

送喜相僧超然歸廬山

九疊峰前遠法師長安塵染坐禪衣十年依舊雙瞳碧  
萬里今持一笑歸鼠目向來吾自了龜腸從與世相違

酒酣更欲煩公說黃葉漫山錫杖飛

休日早起

朧朧窗影來稍稍禽聲集開門知有雨老樹半身濕劇  
讀了無味遠遊非所急蒲團著身寬安取萬戶邑開鏡  
白雲度捲簾秋光入飽受今日閒明朝復羈縻

夏夜

幽窗報夕霽微月在屋櫺手中白羽扇共此夜寥寥六  
月天上碧三更樹微搖緬懷山中景茲夕感路遙長嘯

送行雲可望不可招夜闌林光發白露濡青條

寒食

草草隨時事蕭蕭傍水門濃陰花照野寒食柳圍村客  
袂空佳節鶯聲忽故園不知何處笛吹恨滿清尊

夜步堤上

三首

世故生白髮意行無與期平生木上座臨老始相知月  
中沙岸永歲暮河流遲留侯廟前柳葉盡空離離百年  
信難料賸賦奇絕詩

人間睡聲起幽子方獨步倚杖看白雲亭亭水中度十  
月鴈背高三更河流去物生各擾擾念此煎百慮聊將  
憂世心數遍橋西樹

旋買青芒鞋去踏沙頭月爭教冠蓋地著此景突兀樹  
寒棲鳥動風轉孤管發月色夜夜佳人生事如髮夢中  
續清遊濃露濕銀闕

八關僧房遇雨

脫履坐明窻偶至情更適池上風忽來斜雨滿高壁探

松含歲暮幽鳥立晝寂世故方未闌焚香破今夕

贈黃家阿莘

君家阿莘如白玉呼出燈前語陸續可憐郎罷窮一生  
只今有汝照茅屋猪生十子豚復豚阿莘明年可當門  
階庭一笑不外索萬事紛紛何足論

縱步至董氏園亭

池光脩竹裏筇杖季春頭客子愁無柰桃花笑不休百  
年今日勝萬里此生浮莽莽尊前事題詩寄獨遊

印老索鈍庵詩

人言融公懶牀上揖賓客我來兩忘揖團團一庵白戲  
談鄧州禪分食天寧麥竹風亦喜我蕭索至日夕出家  
丈夫事軒冕本兒劇願香驚餘烟世故感陳迹固應師  
未鈍使我不安席時求一滴水為洗三生石

遊董園

西園可散髮何必賦遠遊地曠多雄風葉聲無時休幸  
有濟勝具枯藜杖白頭平生會心處未覺身淹留散坐

青石牀松意淡欲秋薄雨青衆卉深林耿微流一涼天  
地德物我俱夷猶東北方用武六月事戈矛甲裳無乃  
重腐儒故多憂珍禽叫高樹且復寄悠悠

道中書事

臨老傷行役藍輿歲月奔客愁無處避世事不堪論白  
道含秋色青山帶雨痕壞梁斜闕水喬木密藏村易破  
還家夢難招去國魂一身從白首隨意答乾坤

將次葉城道中



荒野少人去竹輿伊軋聲晴雲秋更白野水暮還明寂  
寞信吾道淹留諳物情王喬有餘舄借我一東征

與季申信道自光化復入鄧書事

二首

賣舟作歸計竹簾穩如舟霧收青臯濕行路當春遊老  
馬不自知意欲踏九州依然還故樾寂寞壯心休

二

再來生白髮重見鄧州春依舊城西路桃花不記人卜  
居得窮巷日色滿窗新微吟驚市卒獨鶴語城闌

感事

喪亂那堪說干戈竟未休  
鄉關勞北望江漢故東流  
風斷黃龍府雲移白鷺洲  
云何舒國步特底副君憂

遊南嶂同孫信道

遙瞻南嶂深復深雙崖與天藏  
太陰青鞋濟勝不能嬾  
踏破積雪窮崎嶇空中朽樹抱孤篠  
無竅蒼壁生橫林  
孤禽三呌危石裂欲返未返神蕭森  
磴迴忽然何處所  
當面烟如翠蛟舞石門泄風無晝夜  
古木截道藏雷雨

丹丘赤城去幾許下視人間足塵土放身天地不自知  
導以龍蛇翼熊虎山中異事記今晨杖藜得道孫與陳

同信道晚登古原

幽懷忽牢落起望登古原微吹度脩竹半林白翻翻日  
暮紛物態山空銷客魂惜無一尊酒與子醉中言

入山

都迷去時路策杖煙漫漫微雨洗春色諸峰生晚寒  
欲離均陽而雨不止書八句寄何子應

江城八月楓葉彫城頭哦詩江動搖秋雨留人意戀戀  
水光泛樹風蕭蕭綸巾老子無遠策長作東西南北客  
不如何遜在揚州坐待梅花映粧額

均陽舟中夜賦

游子不能寐船頭語輕波開窗望兩津煙樹何其多晴  
江涵萬象夜半光蕩摩客愁彌世路秋氣入天河汝洛  
塵未銷幾人不負戈長吟宇宙內激烈悲蹉跎

石城夜賦

初月光滿江斷處知急流沉沉石城夜漠漠河漢秋為  
客寐常晚臨風意難收三更把樓底身世入搔頭

居夷行

遭亂始知承平樂居夷更覺中原好巴陵十月江不平  
萬里北風吹客倒洞庭葉稀秋聲歇黃帝樂罷川杲杲  
君山偃蹇橫歲暮天映湖南白如掃人世多違壯士悲  
干戈未定書生老揚州雲氣鬱不動白首頻回費私禱  
后勝誤齊已莫追范蠡圖越當若為皇天豈無悔過意

君子慎惜經綸時願聞羣公張王室臣也安眠送餘日  
寒食日遊百花亭

晴氣已復濁虛館可淹留微花耿寒食始覺在它州自  
聞鼙鼓聒不恨歲月流亂代有今夕茲園况堪遊雲移  
樹陰失風定川華收曳杖新城下日暮禽語幽羣行意  
易分獨賞興難周咏嘯以自暢片月生城頭

晚晴野望

洞庭微雨後涼氣入綸巾水底歸雲亂蘆叢返照新遙

汀橫薄暮獨鳥度長津兵甲無歸日江湖送老身悠悠  
只倚杖悄悄自傷神天意蒼茫裏村醪亦醉人

舟抵華容縣

篙舟入華容白水繞城堞夾津列茂樹倒影青相接遠  
色分村塢微涼動蘆葉天地困腐儒江湖託孤楫

夜賦

泊舟華容縣湖水終夜明淒然不能寐左右菰蒲聲窮  
途事多違勝處亦心驚三更螢火鬧萬里天河橫阿瞞

狼狽地山澤空崢嶸強弱與興衰今古莽難平腐儒憂  
平世況復值甲兵終然無寸策白髮滿頭生

夜月

獨立夜轆轤蘆聲泛遙津月下風起波莽莽白龍鱗陰  
彩凝草木暑氣森星辰天地塵未消江湖氣聊伸人生  
幾今夕亂代偶此身胡為不少樂況乃迹易陳三更大  
魚舞悄愴驚心神永懷騎鯨士發興煙中新

寥落



寥落洞庭野微風泛客裾  
袁宏詠史罷孫登清嘯餘月  
明流水去夜靜芙蓉舒城郭方多事野興一蕭疎

九日自巴丘適湖南別粹翁

離合不可常去住兩無策  
渺渺孤飛鴈嚴霜欺羽翼使  
君南道主終日好看客江湖尊前深日月夢中疾世事  
不相貸秋風撼鉶錫南雲本同征變化知無極四年孤  
臣淚萬里遊子色臨別不得言清愁漲胃臆

留別天寧永慶乾明金鸞四老

我生能幾何兩脚疲世故忽破巴丘夢還尋邵陽路窮  
鄉得四老足以慰遲暮勝事遠公蓮深心懶殘芋本是  
羣山雲暫聚當別去那知天風便不得還相聚凡情我  
未免臨別吐幽句慎勿過虎溪曉霜侵杖屨

別岳州

朝食三斗葱暮飲三斗醋寧受此酸辛莫行歲晚路丈  
夫少壯日忍窮不自怒乘除冀晚泰乃復逢變故經年  
岳陽樓不見南宮樹辭巢已萬里兩脚未遑住水落君

山高洞庭秋已素浮雲易歸岫遠客難回顧飄然一緋  
錫未知所掛處寂寞短歌行蕭條遠遊賦學道始恨晚  
為儒孰非腐乾坤杳茫茫三嘆出門去

元日

五年元日只流離楚俗今年事事非後飲屠蘇驚已老  
長乘舴艋竟安歸携家作客真無策學道刳心却自違  
汀草岸花知節序一身千恨獨霑衣

初至邵陽逢入桂林使作書問其地之安危

湖北彌年所長沙費月餘初為邵陽夢又作桂林書老  
矣身安用飄然計本疎管寧遼海上何得更端居

今夕

今夕定何夕對此山蒼然偷生經五載幽意獨已堅微  
陰拱衆木靜夜聞孤泉唯應寂寞事可以送餘年

雷雨行

憶昨炎正中不融元帥仗鉞臨山東萬方嗷嗷叫上帝  
黃屋已照睢陽宮嗚呼吾君天所立豈料四載猶服戎

禹巡會稽不到海未省駕船觀民風定知諫諍有張猛  
不可危急無高共自古美惡周必復狼星汝莫見妖凶  
吉語四奏元氣通德音夜發春改容雷雨一日遍天下  
父老感泣霑其胷臣少憂國今成翁欲起荷戟傷疲癯  
小遊太一未移次大樹將軍莫振功劉琨祖逖未足雄  
晏球一戰腥臊空諸君努力先竹素天子可使塵常蒙  
君不見夷門山頭虎復龍向來佳氣元葱葱

開辟置窗命曰遠軒

鍾妖鳴吾旁楊獠舞吾側東西俱有礙羣盜何時息丈  
夫堂堂軀坐受世逼迫仙人千仞岡下視笑予厄誰能  
久鬱鬱持斧破南壁窗開三尺明空納萬里碧岩霏雜  
川靄奇變供几席誰見老書生軒中岸玄幘蕩漾浮世  
裏迢迢送茲夕倚檻發孤嘯呼月出荒澤天公亦粲然  
林壑受珠璧會有鶴賀賓經過來見客

六月十七日夜寄邢子友

暑雨雖不足涼風還有餘樂此城陰夜何殊山嶠居月

明蒼檜立露下芭蕉舒試問澄虛閣今夕復焉如

選碧軒作呈使君少隱時欲赴召

我本山中人一喚起趨埃塵君為邊城守作意邀山  
入窗牖朝來爽氣如有期送我憑軒一杯酒丈夫已忍  
猿鶴羞欲去且復斯須留西峰未脫萬鬟擁東嶺烟破  
脩眉浮主人愛客山更好醉裏一笑驚蠻州丁寧雲雨  
莫作厄明日青山當逐客

愚溪

小閣當喬木清溪抱竹林寒聲日暮起客思雨中深行  
李妨幽事欄干試獨臨終然遊子意非復昔人心

登海山樓

萬航如鳬鷺一水如虛空此地接元氣壓以樓觀雄我  
來自中州登臨眩冲融白波動南極蒼鬢承東風人間  
路浩浩海上春濛濛遠遊為兩眸豈惜勞我躬仙人欲  
吾語薄暮山葱蘢海清無蜃氣彼固蓬萊宮

題長岡亭呈德升大光



久客不忘歸如頭垢思沐身行江海濱夢繞嵩山麓馬  
何預得失鵬何了淹速匣中三尺冰瘴雨生新綠胡為  
古驛中坐聽風吟木既非還吳張亦異赴洛陸兩公茂  
名實自是宜鼎軸發發不可遲帝言頻郁穆

過下杯渡

夜宿下杯館朝鳴一棹東湖平天盡落峽斷海橫通冉  
冉雲隨舸茫茫鳥遡風仙人蓬島上遙見我乘空

秋夜獨酌

涼秋佳夕天氣廓河漢之涯秋漠漠月出未出林彩變  
幽人露坐方獨酌自歌新調酒如空天星下飲觥船中  
忽思李白不可見夜半喬木搖西風百年佳月幾今夕  
憂樂相尋老來疾瓊瑤滿地我影橫添酒賦詩何可失  
西軒

平生江海志歲暮僧廬中虛齋時獨步邈此西窗風初  
夏氣未變幽居念方沖三日無客來門外生蒿蓬輕陰  
映夕幌窈窕花紅未知古來士誰與此心同

雪

仙人手持白鸞尾夜半朝元明月裏羽衣三振風不斷  
下視銀潢一千里王軟裁花分後前欲落未落天恍然  
餘標從向人間去乞與袁安破曉眠